



太平三書卷之十

濟南張萬選舉之甫編輯

風雅一集

青山記

郭祥正

當塗有山曰青山又曰謝公山齊謝玄暉守宣城時  
建別宅於此山而每往遊焉廢地遺址隱隱尚存左  
丹湖右長江穹窿盤礴延數十里爲當塗諸山之表  
山之東南修松夾徑而上幾二百丈依岸立屋曰巢

雲亭亭之陰甃甃爲磴道又十餘丈三門翼然臨于亭上曰白雲之院院之中亭有石窟濤泉深三十尺色若粉乳而味甘益茶歲或大旱不竭因窟壘石爲方池跨池爲飛橋以登於殿殿之北爲堂環以廊廡東爲齋羞之厨西爲待賓之所堂之北爲檻面圍植金沙茶蘼延蔓而爲洞佳花美竹交榦而成林當濤明花敷之時遊人無日不來雖太守亦有時而至也由巢雲而望則春空晴明千里一碧良田沃壤高下

而相連長溪深溝回旋而交映行人往來飛鳥出沒蓋不可以目力窮也而或雲煙晦冥雷雨震作窓戶之下咫尺莫辨居僧恬然見以爲常則院據山之高處槩可知矣始謂之南峰院載於圖經而無碑志可以考其建置之迹嘉祐中改賜今額我先君金紫當祥符間爲進士結友習課於南峰者久之吾母同安郡太夫人張氏又家于此山之下予晚仕于朝或進或退數過是院登高遠望而思吾先君之遺風思無

可得者欹椽敗瓦不蔽風雨未嘗不感慨太息而去  
至熙寧中有僧希仁始來住持未果興構遽卒弟子  
懷式者繼之式有才略不求於人而求於已一金而  
積積至數千萬緡歷二十餘年而所謂殿堂廊廡三  
門池亭之屋一切新之又召良匠塑佛菩薩侍衛凡  
九軀金碧煥耀冠纓飛動爲一山之鎮焉嗚呼盛哉  
蓋院之廢興繫乎主者之才否抑亦有其時耶宋受  
天命神聖繼位皆以仁治天下好生而惡殺戢兵而

惠民是以時和歲豐民阜於財而浮屠氏求取於民  
者無厭然民亦喜爲之施也於是列剎相望爭以侈  
大爲勝事式師則不然因山而爲屋因泉而爲池壯  
而不僭朴而不陋聚景物之佳趣資衣冠之盛遊其  
興作之費一出于已而不求于人也得不謂之才乎  
浮屠氏聞式師之風者亦可以懷愧矣予故爲之叙  
其事刻于碑使後之人有以考焉

懷青山草堂

前人

三峰連延一峰尊龍山白紵如兒孫重岡復嶺控官  
道北望金陵真國門淙流奔激灑河漢兩溪直接丹  
湖源松荒檜老古佛剎雞鳴春曉桃花村石崩廢井  
謝公宅龜仆斷碣長庚墳斯人白骨已化土英氣往  
往成烟雲我昔棄官結茅宇九品青衫安足數竹筒  
盛酒騎白牛醉眼瞻天與天語寧知一旦隨辟書十  
年又向塵途趨只今兩鬢滿霜雪功業不成思舊廬  
山花解忘憂山鳥鳴提壺四隣未必便棄我三徑荒

草還堪鋤烏泥田肥種秫稻紫萸味美饒嘉魚盈缸  
釀酒邀客飲林下散髮時時梳誰人繫爾不歸去自  
問此心無乃愚

采石渡

前人

采石渡頭風浪惡九道驚湍注山脚金牛出沒入莫  
知翠壁巒岈嶮如削上有藤蘿羃霧張羽蓋下有洞  
窟崩澌震天樂水神開府定歲年犀燭朱衣馬爭躍  
我來攬古憑陽春高吟未遇謝將軍騎鯨捉月去不

返空餘綠草翰林墳風期亢爽非今古冥冥神交兩  
相許倒提金斗傾濁醪滴瀝招魂寂無語斜陽啣山  
暝潮退兩兩漁舟迷向背便欲因之垂釣竿六鼇一  
擲天門外

望夫山

前人

帆去帆來人不識歲歲年年望無極夕陽欲盡洲渚  
昏猶見天門一雙碧

暮秋登黃山

前人

秋風已瀟灑臨高念歲窮陣收羣雁沒峰斷片雲空  
月色山川內笛聲關塞中西人未柔服長策在諸公

廣福禪寺

前人

寺與人寰隔西軒更遠瞻雲烟分卷箔星斗半垂簷  
山對眉雙碧江空鏡一奩旅魂招不盡愁向酒中添

玩鞭亭

前人

平湖春靜水陰天基壓危城駕廣椽駿馬豈能追晚  
日將軍莫悔玩遺鞭高才共賦新亭句逸翰重將舊

曲鑄千古英雄只如此黃花修竹付幽禪

化城寺清風亭

前人

唐時升老亭剪棘今重開南瞻峨眉關北峙凌歊臺  
新公將家子爲僧亦多才譬彼獨鶴唳安用羣雞猜  
或彈玉軫琴傾耳濯纖埃清風不知處凜冽時時來  
吹雲雲窈窕吹月月徘徊幽人許共賞渴心咀珍梅  
了然得真味塵魂自然摧令侄又豪俊書名駭奔雷  
禪談屢終夕茗酌無餘盃還歌太白篇事往良可哀

古今倘同轍浩氣不寒灰

凌歊臺

前人

宋武登臨避暑敲當年歌吹逼雲霄天涵暗色收平  
遠潮逆江聲送寂寥人跡有誰能暫息客魂無着易  
爲消只今莫問興亾事且撥香醅醉一瓢

隱靜普惠寺

前人

碧霄峰下車輪停道師未返誰逢迎山雲着地雨正  
急春水滿田人不耕饑虎嘯風大石裂倦鳥喚雛深

澗鳴客心欲去日復止坐飽香飯餘何營

北園載酒和蔡確詩

徐迪

簷影蔭游魚江聲顫崖竹雲帆天外去龍刹空中轟  
霞明晚渡紅草暖晴沙綠澄波見歸鳥紛靄迷飛鷺  
有時雪浪吹玉馬爭追逐青霄皓月滿琉璃瑩顛目  
謝傳昔出宰天葩動驚俗一讀梁問詩清風感佳木

廣福寺

張祁

老矣丹心在愁來酒興濃江山遣古意雲水淡秋容

落日孤村笛微風遠寺鍾平生善知識却憶妙高峰

乾道修學建閣記

張孝祥

學古也廟于學以祀孔子後世之制也閣于學以藏  
天子之書古今之通義而臣子之恭也當塗於江淮  
爲名郡有學也無誦說之所有廟也無薦享之地有  
天子之書坎而寘之屋壁甲申秋直秘閣王侯柅來  
領太守事於是方有水災盡壞隄防民不粒食及冬  
則有邊事當塗兵之衝上下震搖侯下車救災之政



太平三書  
卷之十  
備敵之略皆有次序饑者飽壞者築赤白囊晝夜至  
侯一以靜鎮之明年春和議成改元乾道將釋奠于  
學侯語教授沈瀛曰學如是今吾州內外之事略定  
孰先於此者命其掾蔣暉呂濱中撤而新之先是郡  
將欲樓居材既具侯命取以爲閣闢其門而重之凡  
學之所宜有無一不備客有過而歎曰賢之不可已  
也如是夫今之當塗昔之當塗也來爲守者孰不知  
學之宜葺而獨忘之者豈真忘之哉力不贍爾始王

侯之來民以水爲憂已又以兵爲憂王侯易民之憂  
納之安樂之地以其餘力大新茲學役不及民頤指  
而辨賢之不可已也如是夫客又歎曰堯舜禹湯文  
武之天下傳之至今天地之位日月之明江河之流  
萬世無弊者也時治時亂時強時弱豈有他哉人而  
已爾財用之不給兵甲之不強人才之不多寧真不  
可爲邪詩曰無競維人謂予不信請視新學

遊赭山

前人

昨日一尺雪今朝十分晴杲日上積雪光若虹氣升  
江平鏡新磨地迥玉琢成赭山有令色令我白眼青  
借馬至東家喚客踏層冰帽貂挾裘茸石路五里平  
竹樹紛掩冉珠幢間霓旌野僧不慣客舍皇門前迎  
屋古少完壁堂空有危燈石上跡宛宛山腰塔亭亭  
劫火偶不燒百年費支撐我有一尊酒高處得細傾  
諒非無事飲憂國空含情長歌渺寥廓歸路已戴星

夢日亭滿江紅

前人

千古淒涼興亡事但悲陳迹迷望眼吳波不動楚山  
叢碧巴驥駮駿追風遠武昌雲旆連江赤笑老姦遺  
臭到如今空畱壁軍書靜烽烟息通輶傳消鋒鏑仰  
太平天子坐收長策蹴踏揚州開帝里渡江天馬龍  
爲匹看東南佳氣鬱蔥蔥傳千億

江上晚行

方汝疆

疎雲薄日冷吳江江色蘆花共渺茫四五點山煙靄  
淡兩三枝槩水雲長遊魚避網驚微浪幽鷺窺汀下

夕陽興罷歸來更回首滿身明月踏溪霜

石城山

李習

翠微山影暮遙遙林木已經霜露凋空見義兵巨晉  
室只餘禪寺說梁朝冷烟戍卒煨紅腐暖日遊人擁  
翠翹惟有馮夷千載恨夜深和月響江湖

大成殿賦

陶安

遭文明之盛世兮流聲教以彌幅員闢虎闥於壁水  
兮示彝倫之所先校庠布乎郡邑兮威在廟而清蠲

巍乎大成之禮殿兮嚴報本於文宣承皇后之嘉惠  
兮詔徽稱以致崇撫鄒魯之微言兮盡盛德之形容  
總條貫於金玉兮翕衆音之始終是曰大成兮視夷  
惠焉能同著嘉名而有自兮侔制作乎王宮大江之  
南曰姑孰兮面蒼翠之三峰溪流繚乎城邑兮藹洙  
泗之遺風湛清波之半壁兮循橋門而泐泐蔚喬蔭  
於文檜兮發秀色於蒼芹歲冉冉其屢更兮棟將撓  
而榱桷蠹澹煙蕪於黃昏兮恐佳期之不吾遇苟作

興之有俟兮亦何恨乎遲暮思美人而忽見兮羗避  
迨於南上駕五馬之翩翩兮載雲旌而容與指泮水  
以弭節兮蹇將覲夫靈宇東階兮肅升酌芳馨兮薦  
誠華宸塵兮袞龍翳中庭凄兮綠草生澹觀者兮忘  
情獨侯心兮靡寧謂天地之廓大兮惟聖道其服參  
帝乘龍以撫運兮儒化罔間於朔南空崇構以宅尊  
兮夫豈卑圖之所堪歲月逝而益圯兮將承宣之我  
慚莘縉紳以詢兮恢新制而經營協靈辰以遷主兮

命梓人使效能擢良材於鄧林兮輦巨石於巖扃百  
工繽紛以雲集兮隱斤斧之轟轟察屬協心以贊承  
兮曾不日而告成隆殿崛其山起兮象紫微之法宮  
旅楹植立而絢丹兮飛梁駕乎長虹朱甍采桷翼其  
如翬兮仰之高而彌崇信乎不可階而升兮夫何岌  
業而從寵燎木蘭而楣辛夷兮煥玉題與金鋪鏤蒼  
珉以爲礎兮削文杏以爲樞敞寬平於赤墀兮納光  
景於綺疏碧參差其萬瓦兮躍龍鱗於天衢其勢出

類而拔萃兮蓋將與造物而爲徒溘埃風兮排雲類  
特立兮無羣千元氣兮網緼類太和兮萃於一身赫  
奕兮輝煌猶髣髴兮文章倏雲譎而波詭兮象神化  
之無方其陰陽之闔闢兮與日月其齊光晨燎設兮  
獻穀醑安神居兮啓瑤戶皇剡剡兮揚靈率雲霓兮  
來御肅上公兮列侑被赤紱兮自天而下心悒鬱而  
未舒兮睠焉不能舍也位門廡以協制兮建推宏之  
廈也圭冕秩於東西兮挹道德之遺芳五綵彰施於

五色兮粲繡繪於衣裳列星布乎朱扉兮爛昭昭其  
未央士之誠敬有所瞻兮儼素王之洋洋重曰春秋  
紛其多故兮傷周綱之久陵嘉尼山之毓靈兮胡唐  
虞之弗興環連轍以振鐸兮慨無人乎我聆跽祥麟  
於魯郊兮淚浪浪其忽零明王不作孰宗子兮歸闡  
教於遺經開世道之隆平兮示人主之儀刑惟熙朝  
之累洽兮躡漢唐而軼三代恢帝德之如天兮鼓皇  
風於無外建人極以爲標準兮孰若夫子事功之尤

大生民以來未有斯盛今亦何啻乎羣山之宗岱室  
悉心以興學今知化原之有在峙壯觀乎江表兮伊  
斯文之有賴事畢兮功深丹堊煥兮鶚林登俎邊兮  
奏八音告日上丁兮神所歆嚴齋宮兮集衿佩播絃  
誦兮游六藝雲飛騰兮雨滂沛漸教澤兮被萬世諱  
曰孔子之道集大成兮新廟奕奕揭鴻名兮厥高造  
天鬱崢嶸兮龍章當陽儼穆清兮邦之具瞻侯所營  
兮億載文運日月其明兮

青山謝玄暉宅

今爲葆和觀

前人

曾是玄暉舊隱居忽看殊境現仙都池漚晝涌泉根  
活巖木秋凋石骨臞栗殼黃腴獮哺子松巢碧冷鶴  
溫雛道人鍊罷芙蓉鼎紫玉簫橫鳳繞梧

李翰林墓

前人

自別金鑿抵夜郎江南有夢到朝堂酒酣采石風生  
袂屋老青山月滿梁龍管鳳笙遺韻律筆蘆笙竹借  
文章雲飛荒野苔碑斷時有詩人酌一觴

遊蛾眉亭記

前人

出大江而山曰采石昔人因其山川雄麗亭絕壁上以盡登覽之美前直東西二梁山夾江對峙修嫵靚好宛宛如蛾眉遂以名亭亦東南之奇觀也歲久弗治棟宇垣墉日就於弊經歷亦速甫君贊理太平郡府暇日臨視歎曰不韋奚稱遂請于太守鳧山賈公慨然發已資倡謀修營應者翁從未幾煥焉華飾輦飛麗空視昔有加夫采石爲地當南北之衝風帆浪

楫繽紛朝夕使客之往來賈貨之繁萃又有文儒韻士遨遊題詠觀其波濤澎湃吐吞乎吳楚烟雲杳靄出沒乎淮甸一視千里洞無所翳雖窮巒剝澗僻在遐隱莫不貢靈輪秀於軒楹之下况前賢於此遊觀俯仰高風雋烈有關世道之興廢炳炳遺迹昭著古今令人興懷而不能已君能留意於此非特盡登覽之美亦不泯前賢之迹也

天門山

前人

石壁脫屣鏞倚空雙觀臺江流關不住閭闔豁然開  
雲表羣仙望舟中獨客回欲揮千丈筆題鳳記曾來

登高凌歊臺

前人

粉黛香銷輦路荒雨晴菊意媚重陽長江落木秋無  
際短帽西風鬢有霜千嶂馬騰環重鎮萬松龍舞蔭  
禪房英雄多被繁華誤蜀雪湘雲舊恨長

魯港

前人

昔年遊此地市井簇人煙水驛官船鼓花林酒閣絃

重來盡蘆渚何異變桑田回望礫磯在臨流獨悵然

荻港

前人

空垣霜蘚濕鷄犬四無聞恠樹作人立斷碑經火焚  
溝魚爭雪水山鳥哢朝昕信步不知處風林樵運斤

丹陽湖蒹葭雪霽

潘庭堅

蘆葦雪初霽枝頭半未消漁翁叢底出小艇載瓊瑤

赭山塔

黃禮

一帶峰巒壓巨鰲古今傳說赭黃袍四圍空翠連雲



起百尺浮屠拔地高  
雨過澗前流石髓水環巖下長  
谿毛東風不管興  
亾事開遍誰家幾樹桃

雄觀亭

前人

西望奔流滾滾來  
一亭高占鷲峰開  
排空怒捲千堆雪  
逐岸喧豨萬壑雷  
仙子渡江遺珮去  
鮫人入市賣綃回  
漁翁舞罷釣天樂  
月白風清酒一杯

荆山

前人

兩峰相對鬱嵯峨  
下瞰湖光勝槩多  
練帶平鋪橫翠

影蛾眉淡掃  
炤蒼波雲連石洞蛟  
龍宅雪壓叢林鶴  
鸛窩夜半白虹光彩發  
誰知碧玉在山阿

長河

前人

老蟾飛影下天衢  
冷浸人間玉一壺  
秋靜龍宮開寶鏡  
夜深淵客泣驪珠  
燈明隔岸收罾網  
櫂過中流駕舳艫  
誰識漁郎有深趣  
短篋獨束寄江湖

橫山龍井

楊體仁

松根石欄空剝落  
古甃苔深林影薄  
一泓寒碧湛渟

澹神物何年露頭角黑雲壓山山欲平夜半忽與風  
雷爭明朝山下新雨足野老扶犁歌太平

凌歊夕照

李汶

宋武層臺映夕陽千章喬木晚蒼蒼鳥聲還似弦歌  
奏花艷猶疑粉賦光雪盡湘潭山隱映江通巴蜀水  
微茫登臨却憶繁華地搔首西風感慨長

采石

李勝原

夜深風靜水無波獨立江頭且浩歌買酒放懷人醉  
後滿船無奈月明何袁宏泊渚名猶在溫嶠燃犀恨  
已多明日江頭掛帆去興來重淬劍鋒磨

魯港

前人

一日風帆駕雪濤晚來牽纜此江臯遠山雲外橫千  
里新水船頭長半篙鷗鳥驚飛前渚去身鴉又向隔  
林號倚篷酒醒寒相逼喚起山童整敝袍

峩橋雪霽

入圖畫

嚴允諧

玉龍戰罷鱗甲摧玉妃無數下九垓溪橋高下銀成

堆金鳥飛上扶桑  
枚頓令萬物生光輝  
客騎驢背去  
復回忍寒渡橋君  
試猜不是尋詩定訪梅

三山秋月

入圖書

前人

三峰翠嶽翠鬱蔥  
神工削出真芙蓉  
桂影飛上滄海  
東須臾寶鑑懸長空  
老猿弄影掛樹啼  
鳥鵲亦有枝  
堪栖山翁愛月楊  
明輝把酒對月重賦詩

覆釜晴嵐

入圖書

前人

女媧煮石補天漏  
五色補天天補就  
大釜至今從地  
覆乾象穹窿壓神厚  
天光散作翠嵐浮  
爲雨爲雲潤  
巖竇朝來拄笏看  
爽氣方寸盡歸仁者壽

浮丘丹井

入圖書

前人

浮丘峰高三十六  
三十六峰如削玉  
浮丘仙去三千年  
山中獨遺丹井泉  
井泉寒冽深更深  
鬼神呵護到於今  
山下幽人時極目  
尚有丹光穿樹林

荻浦歸帆

入圖書

前人

西江水濶清可掬  
江上征帆歸興速  
遠從天外忽飛

來波心影落玻璃窟翩翩疑是雁翱翔悠悠恍若雲  
馳逐夕陽西下徑何之乘風遠過海門曲

文昌宮

祖雋

林樾蕭蕭一境寬仙家樓閣跨高寒桃花曉色迷城  
堞芝草春香護石壇琪樹靜中韶鶴下碧潭深處毒  
龍蟠道人日飽青精飯閒把黃庭取次看

萬壽寺

卽化城寺

前人

樹遶祇園水遶堤市塵渾不到招提半窗白月見猿  
掛一榻綠陰聞鳥啼座擁金欄僧設講壁垂玉筍客  
留題年來我亦耽瀟灑幾度重遊散馬蹄

無相寺

前人

路分烟草入林堦臺殿參差接杳冥僧獻茗花來後  
院鶴搖松子落中庭湖光冷浸青銅鏡山色晴開翠  
玉屏最愛上方幽閒處六時鍾磬自泠泠

尼坡梅月

前人

殘雪坡前水漾澌孤芳皎潔月明時暗香浮動通虛

逕竦影橫斜浸碧漪素質祇宜和靖識真心獨許廣  
平知幽人紙帳閒眠處骨冷神清入夢遲

咸寶圩桓玄故赭圻城在此

前人

曉乘清興過咸溪風景蒼茫望轉迷如意好花當馬  
落盡情幽鳥傷人啼數家茆屋牽蘿補幾處沙田帶  
雨犁薄暮欲尋歸去路小橋流水夕陽西

登橫山訪陶貞白僊跡

鍾銘

曲磴穿雲上冷然御太虛寺經桑海變墓自晉唐餘

雨過山容皎雲低松影疎幽奇探未盡如夢入華胥

秋夜泛舟丹陽湖

前人

一片空明境界殊疎林遙襯野雲孤沙鷗影逐波深  
淺漁笛聲隨風有無湖蘊月輝光若練楓經霜染錦  
如鋪停舟四望渾無際恍覺身輕在玉壺

姑孰

謝騫

江南佳麗地吾郡亦如何謝眺青山宅桓溫白紵歌  
丹湖漁棹滿采石客帆多最愛月盤景長松掛薜蘿

太白墓

前人

不見風流李翰林數椽祠宇對雲岑  
匡時徒抱經綸志載籍爭傳正始音  
故隴荒涼春草合斷碑剝落雨苔深  
升沉莫論開元事贏得芳名照古今

遊景山

前人

半山亭在月盤峰幾度登臨興未窮  
野水閒雲孤島外疎櫺石磴百花中  
龍嘘雨氣迷深洞鶴鼓風聲動怪松  
春社散來循舊路桑麻深處綠烟濃

登六角亭

鍾城

春風厲修垆餘寒峭孤往晞髮太白樓  
鼓掉胭脂港迴還丹林岑超忽紫烟岬  
睽睽彼六角亭登升詎虛罔窟宅隱僊  
洞奧窅秘人壤遐馳本年歲擷勝希今曩  
璠界擴往運畸人擅華獎山空雨鬱蒸  
江崩氣汪漾日月炯懸照乾坤曠虛朗  
放岩榛蕩密遵渚龜鼉吭危波沃陽趾  
反徑造幽壑洪濤亂雲煙日夕駭衝撞  
睨視發蒙覆俯窺乃空蕩松浪瀉奔壑  
煙標闢玄裝

太平三書 卷之十  
林麓互蔽。虧樓閣恣弘敞。曲磯轉隱見。孤舟去鬚髮。  
鬱哉崇丘垌。洞矣修谷響。金牛鎖員嶠。靈匹停玄想。  
槭槭蘿屋翻。鬢鬢奔雲上。依依池閣暝。颯颯風雨莽。  
塵世脫束羈。宇宙一偃仰。蹇予山水情。茲焉修躅枉。  
浩歌欲何言。徒倚千華杖。

登白苧山

端宏

日月隨天壁。煙霞繞洞宮。簷濤散春竹。石氣灑寒松。  
江濶雷門殿。雲孤白苧峰。回瞻三萬里。鷗鷺薦長風。

黃山廣福寺

劉源

方外松蘿隔綠霞。日移金碧絢窓紗。香焚石鼎飄輕  
縷。鉢洗山泉帶落花。樹色雲迷巢野鶴。鍾聲風送起  
林鴉。老僧定後禪機息。斫竹敲冰旋煮茶。

凌歊臺

李蕙

三千歌舞地。老樹鎖蒼烟。殿古成荒徑。碑殘刻宋年。  
啼禽應哽咽。流水自潺湲。世事渾如夢。登臨倍悵然。

凌歊臺

謝理

鳥道崎嶇上復回攀蘿挽葛剩青苔也知地老天荒  
處曾貯燕歌趙舞來谷口鳥催春雨急渡頭帆帶夕  
陽開二陵只在江雲外環珮應敲月下臺

凌敲臺館淡烟霞尚有鮫人識絳紗土砌不生蕙莢  
草山房唯見欵冬花龍鍾無意對春鳥鼉鼓有聲來  
晚鴉蘇晉長齋仍禁酒月團空憶建溪茶

橫望山武安王廟二首

楊觀

鶴書無復下雲坳廢井荒園掩白茅雨後亂山晴翠

合春深萬木綠陰交斷崖曾說神蛟出破碣誰因野  
火敲莫向東風傷往事夕陽歸鳥下林梢

山從疊處自成坳坳裏禪房亂覆茅曲檻斜通蔬圃  
近小窓低與石楠交霏霏花雨鍾初靜灑灑天風竹  
自敲白髮老僧忘甲子年年春信試梅梢

謫仙樓

前人

偉哉唐學士萬古誇風流長庚夢初破光嶽氣完收  
驅珠迸玄窟瑞彩騰九州神蛟起滄海紫鳳翔丹丘



一靈煥天性萬里隨敷求文章重天下特立邈難儔  
鏘鏘組金石燁燁中斗牛浩渺吸河海放逸奔驂騑  
升名震寰宇文章飛冕旒彤廷卽召見降輦迎殿頭  
寶林賜前食御手調羹羞綸綍掌密命操觚輔皇猷  
方將試大用籍籍羣校讎一朝息機用飄然駕歸舟  
仙飈颺輕羽詩酒恣嬉遊飛帆過采石雅爲山水留  
錦袍照綠蟻對月聊自酬酒醒弔玄暉遂作終身謀  
上帝奇君才召記白玉樓擊地墮梁木倚天折吳鉤

墨跡天地久豪氣烟雲浮我來過祠下下馬拜以投  
竦容瞻古貌慨然慕前修溪毛采香綠清酒沽新篘  
一酌復三歎孤心懷百憂穹碑翳莓蘚荒祠掩松楸  
弱柳掉風力織花弄春柔夕陽拂征衣回首陰雲愁

雙桂峰

入圖畫

徐傑

佛道通僊靈姮娥亦皈向手持雙桂枝徘徊下雲帳  
金花映頤頰香風正飄蕩姮娥上天上雙桂屹成嶂  
如何植物性知戀慈仁相堅守菩提根永絕蟠桃餉

婆娑清夜影依約半乾象

洗硯池

入圖書

前人

翀霄姓王氏云是羲之兒性潔愛山水好書復臨池  
波間洗破硯墨浪飛玄魚羲之寫黃庭名聲千載垂  
翀霄書涅槃字畫與竝馳二子已僊去遺跡人間奇  
春風翰墨香秋雨蛟龍悲飛鳥不敢過何必高藩籬

謫僊樓

邢珣

采江寄遐矚滄波浩無邊絕壁俯巨壑秀色欺雲烟

憑高訪先躅牛渚留真傳王孫太白精驚姜下南躔  
壯遊半天下志不忘溝填才名撼天子韋布登瀛僊  
讒毀捍恩澤乞退匡廬眠矯矯梁棟材乃不中榱椽  
將將廟堂器苦窳輕磨鑄致令諷諫詞往遙空談玄  
倏焉漁陽變白日橫戈鋌乘輿徙西蜀海沸龍爲鱣  
時公駕丹丘雲輶任飄翩纍纍潯陽獄自度無二天  
義哉汾陽報匪售私恩憐長流亦君恩臣罪當萬千  
天光炤幽蟄放浪還歸田愛此姑溪勝扁舟涉津淵

太平三書 卷之十  
醉來捉江月曠望登雲巔興至恣吟嘯曳踵盧王前  
卽此心醉處人去山連娟崑樓現金粟墓草眠烏犂  
世事電一白遺芬播青編回思長安陌衰柳號寒蟬  
公逝有不泯玄宅空長嘯

蝶磯

胡燿

長江一寸碧兀兀中瀕洞巴湘春晝浮淮揚秋暮動  
萬古此登眺獨立誰與共

凌敲臺

集古

王禕

九天春色望中回

李子飛

獨上前朝歌吹臺

詩學

苑路

暗迷香輦絕

元禎

風雲猶似翠華來

揭奚斯

城頭煙樹

旌旗合

竹溪

山下樓臺紫翠開

范德機

試問繁華何處

在山

李甫舊遊巖石長莓苔

黃潛

赭山

前人

寒山半出白雲層

劉滄

高塔晴來獨自登

鄭谷

山勢

北來連帝闕

王維

江湖西去遶金陵

林廷舉

嵐光香靄

開圖畫

歐陽恭

夜靜分明見佛燈

瞿祐

景物未窮登覽

興子昂欲將舍利問山僧范五

神山集古

前人

斷碑無字草芊芊李羣此地興祠不計年錢彥古殿

陰雲終日合蘇子美長松風雨半空懸同上千家落日

粉榆社淵海百里西風擺經天錢逸自古英雄須廟

食傳若堂堂遺像在凌烟張藉

長河集古

前人

寒潮惟帶夕陽還皇甫冉銀漢無聲轉玉盤東坡萬頃

碧波秋影淡劉得仁一襟涼沁夜光寒周賀河流倒浸

分雙月潭水西來轉幾山楊公濟為愛滄浪濯纓

處李逢吉蒹葭煙盡水如藍胡曾

慈姥磯孝子祠

王孜

孤舟似匏繫風中三更月出江水空慈烏忽翻廟前  
樹落葉亂下頭上蓬睡來反側坐偏倒布被如水髮  
如草家山咫尺不得到荒壟寒雲誰為掃乾坤百年  
風木情海波浩浩何時平

孝烈橋

前人

淮賊舳艫蔽江滸銅鼓如雷箭如雨山川草木盡顛  
連誰家裙釵心有主帳前花枝漾蜂目橋下春波照  
顏玉白頭魂返豺虎口翠翹影落魚龍窟露筋女祠  
曹娥碑河流一帶雙清輝

丹陽湖八景二首

謝玉

水漲平湖雨後天沿堤楊柳帶朝烟濃陰匝地鶯聲  
細絕勝章臺近灞川

楊柳

天邊飛下雨三行點破蘆花月底霜萬里不辭關塞  
遠年來年去解隨陽

落雁

龍山

楊洪

龍山挿晴昊秋色染芙蓉疊嶂丹青裏奇峰紫翠重  
更無人落帽時有客扶筇撫景歸來晚楓林帶醉容

凌歊臺

楊深

浮丘佳勝路縈迴霸業空遺宋祖臺山色不隨時勢  
去江聲還逐暮潮來香銷紅粉千年恨花落東風幾

度開吊古遊人倍惆悵斷碑磨滅鎖蒼苔

白紵山

前人

白紵山前晚逕深松風飄拂綠成陰蒼波影合潮初  
上碧幹涼生日未沉一曲絲桐秋鶴唳半空雷雨晝  
龍吟徂徠賦後秦封遠千載伊誰續賞音

登清風樓賦

祝鑾

傑哉茲樓余初登以逍遙睠景和兮日麗盼山青兮  
水滲縣縣兮遊絲猗猗兮柔條何羣葩之芳菲穠豔

以交媚兮乃大化之所調忽處嘯兮山之椒起綠蘋  
兮鳴鮮颺初颺颺兮冷冷條習習兮條條發蘭臺之  
高詠滌煩襟以潛消駕蒼虬兮吹碧簫翩雙鳧兮拉  
子喬歌南薰兮解愠協朱鳳兮聞韶懷美人兮路迢  
迢川有梁兮陸有輶恐流光兮冉冉颺飛絮兮飄飄  
登高兮吾將瞻蓬島兮訪參寥安得乘風千里於一  
朝兮于焉報之以瓊瑤

月盤亭

前人

畫棟朱闌露氣寒新亭竝立檜杉攢天橫一帶拖江  
練人靜千山見月盤古洞出龍靈雨沛羣仙跨鶴碧  
霞餐登臨竟日忘歸去便欲乘風刷羽翰

登太白樓

前人

采石磯頭太白亭三年一度此鳴舲長江千古流詩  
派殘月中天見酒星放浪祗疑天地窄氤氳長萃海  
山靈何人吹笛招黃鶴有客携壺過翠屏

登白紵山

端廷赦

白紵春風好杖藜鷓鴣依舊滿山啼僧持野菜炊香  
飯鳥啄閒花宿古隄隔嶺雲霞堪入畫近城樓閣若  
爲梯傷心歌舞當年事一帶斜陽芳草迷

冬日謁青蓮墓

楊東

霜林迢遞鎖荒臺爲吊孤臣黯自哀百代才名高日  
月千秋藻筆走風雷衣冠已謝青山老華表空存白  
鶴來把酒更傷投死事不堪殘照下蒼苔

采石晚眺

前人

揚帆到石門素琴愜幽抱隔浦有人家山行苦奔峭  
落日鍾磬清空江倚孤棹

登峨眉亭

倪嵩

蛾眉亭構鬱雲虹影入煙霄路欲通瓊嶼艷粧迷曉  
月石樓香霧起微風青紆不斷春山外翠斂還凝夕  
照中此日登臨無限意共君長嘯望江東

靈墟山賡韻

鍾書

岩畔猶存煉藥基蒼松白石浸寒漪月明華表遼陽  
夜正是真僊跨鶴時

峨眉亭

楊金

江上峨眉亭屹立山之巔下有牛渚磯奔濤響潏潏  
楚岸樹亦古吳門花欲然梁山鬱嵯峨中流一帆懸  
眺遠豁心目登高俯市廛羨彼簑笠翁沽酒烹魚鮮  
世代有興衰江河多變遷捉月理不經燃犀事亦玄  
往者不可問徒有空名傳我來值初夏憑欄意茫然  
何不飲美酒而乃媿謫僊



花津晚泊

前人

蘭舟蕩樣水雲平孤劍青氈伴客行一抹好山酣夕  
照滿林殘葉亂秋聲手持苔蘚魚經古心遶江湖鶴  
夢清起問鄉村別來事人家空有舊時名

青山道中

前人

李白祠前霜葉飛茅簷當路客來稀謳歌何處忘機  
子日伴烟霞上釣磯

白雲寺枕最高峰石磴荒涼野興濃貼襯眼前風物  
好數株松老欲成龍

黃山

端廷相

數峰青未了幾度白雲鍾古寺開幽徑荒烟起暮春  
松筠高百尺遠近翠千重老至耽修寂扶人當倚筇

姑溪

端鉞

烟鎖橋頭散綺霞忘機鷗鳥踏汀沙晴川畫舫牽楊  
柳小店青旗出杏花遶屋寒星高士卧傍門流水野  
人家賦成歸去來辭晚鐵笛橫吹放鶴斜

青山

倪伯鯨

蒼岩南面白雲多一徑紆回蔭薜蘿  
山色萬重分虎檻水源千里下龍河  
高臺擬作憑雲去絕壁還成藉草過  
莫以流光牽宿醉更教飛棹送微波

藏雲寺

前人

黃葉下紛紛塵囂寂不聞山空能貯日  
寺古獨藏雲曉供諸天切香臺下界分  
何時脫凡想從爾叩真文

五柳渠

在馬埠橋

前人

白馬山前渠路長黑沙湖上映垂楊  
春風不瑣寒溪水盡日潺湲到草堂

春日登青山

倪伯鯨

諸峰迴帶一山尊獨采桃花過遠村  
九井煙光連地合八湖春色到江分  
漫因古渡尋芳草更向寒泉望白雲  
幾接飛蘿空海界不妨天上有人羣

青山望巢湖

前人

返照下石壁高江生暮寒巢湖一片影  
日日上青山

采石懷太白

前人

夢斷金雞海上村  
天涯狂客老吳門  
扁舟遙下半江  
月錦鯉空飛一酒尊  
金馬此時終去國  
青山千古不歸魂  
乾坤俯仰情何極  
寂寞新亭風雨昏

登白紵

前人

春行獨攀躋澗道  
自紆整危峰何翠  
嶺直與煙霄併  
浮雲度碧石巖花  
散天景情存江漢  
遠意愜朝市耿  
山空無人聲聞寂  
發深省蕭蕭草蟲  
語悠悠孤鶴警

凌歊懷古

前人

千山樓闕對江門  
巖畔高臺過雨痕  
吳國草芳虛落日  
蜀江天盡見孤村  
空思野徑埋歌舞  
誰復荒基辨寢園  
人世興亾多少恨  
斷碑枯木自朝昏

女郎祠

祠在黃山

前人

會令山鬼縱文狸  
幾許雙旌拂曉飛  
蘭杜有香薰帝  
闕佩環何日響  
仙扉池開璧水  
畱天影簾捲松  
花落寶衣一自琳  
宮成道後海天  
秋水自心期

太平三書卷之十  
神構仙媛昔所聞班鸞紅鳳若爲分漫看春色隨流水肯委閒心與白雲雙鯉正思青玉案一筭遙對紫皇君五城十二樓中月何處吹簫落雁羣

春日登雷巖同辰山諸丈

前人

雷門俯開曠坡陀帶平疆長風驅松濤直下千仞岡絕壑留孤煙花木麗芬芳洞口逢僊人雙簫吹紫皇緣茅數棲鶻白露生微茫始探心獨愜中更意彌康孤浦截寒波密林崇晞陽萬物洞光景衆鳥爭翱翔金書報鸞鶴浩笑凌青蒼

湖陰道中

前人

路轉溪南白日斜古城荒水浸平沙依依鳥宿煙中樹渺渺人歸江上槎草帶有香分雨氣荷衣無夢薄煙華三秋別恨思今日悵望西巖紅玉花

集嶼磯

前人

東風倚棹吳門地濤頭曉日城霞氣護江堤上柳搖天涵碧樓中花滿砌沙暄草軟青莓苔古磯斷瀨相

滌迴天門兩梁飛棟立斗柄倒掛煙雲開遠見  
巫山色水色山光兩無極凌風馱鶴下蒼茫竹笛一  
聲青嶂碧三台夜列天氣秋旗鼓不驚江畔鷗靈妃  
額上探珠蓋何但崑崙問赤丘

靈墟山題丁仙遺蹟冊

謝九鼎

僊翁去不返丹竈委層峰真境久寂寥烟蘿悶靈蹤  
香花墜岩谷寒澗清心胷孤思凌風鶴幻若行天龍  
世人那復見或與安期逢虛無固難覓想像徒爲容  
瞻對低回處數聲雲外鍾  
千載丁公傳羽化空餘井白碧山阿何年再返遼東  
鶴應嘆今人塚更多

題金柱山

梅淳

孤標宰堵郡城西蠟屐爭疲百尺梯忽有雙蛾天外  
秀回看千雉牖中低種桃種李芳沿岸垂柳垂楊翠  
滿堤。廿載神功三丈石摩娑今日有鐫題

金柱山

謝裘

太平三書 卷之十  
扶筇直上意冷然醉眼蒼茫盡楚天  
疊嶂東來朝爽裡大江西去夕陽前  
舟移濃艷裁花听馬走芊綿馴  
雉田好景勝游人不厭至今芳譽共碑傳

九日同倪士馨登龍山用杜韻 葛森

木落秋山樵徑寬布帆輕下共追歡  
黃花又醉陶家酒短髮還欹杜甫冠  
斜日漸隨千樹暝晚煙橫帶一溪寒  
風流叅佐今塵跡明月青山最耐看

夜泊采石 徐宗夔

紫舟入語靜纖月映江波木葉秋交  
下山烟晚更多隔雲孤磬杳照水一螢  
過估客誰相問中宵發浩歌

九日同老友張墨田錢惺一王式之攜毛生李

姬泛舟登蛾眉亭 倪伯麒

輕舸容與問江關秋水長天趣更閒  
黃菊時分杯底色紫萸微映座中顏  
犀燃牛渚疑千載烟鎖天門妒二鬢  
策杖不愁無濟勝還期呼月醉寒山

秋日偕士馨甥游青山 王之典

名山堪着屐落日共登臨江帶天門霽秋生大壑陰  
蟪蛄封講席龍象泣祗林欲問玄暉宅青山自古今

九日同倪靈海泛舟姑溪

時初自楚歸

前人

天涯飽看洞庭秋歸及黃花續勝游短髮不堪吹落  
帽閒心真可對眠鷗山容傍晚青留席水氣浮天白  
上舟髣彿湘靈猶鼓瑟不知吳棹起清謳

舟歸采石

端鉦

蒼茫山氣靜落日大江流潮湧千家雨帆懸兩岸秋

海日洞天光松風倒孤壁萬象此俱空幽源渺無極

荆山

沈希韶

平田分峙亦亭亭開徑何須是五丁石氣寒凝千頃  
碧波光澹落兩山青雨淋松檜珠爲箔霞映莓苔錦  
作屏溪畔老僧時洗鉢水風猶自帶龍腥

登采石磯

徐紹泰

采石磯峙江之中危嵒突兀誰與同皴裂嶙峋神斧  
功翠葛蒼藤垂朦朧青煙綠霧捲鬱蔥俯臨百仞江

太平三書 卷之十  
聲洪兩梁夾立斷長虹遙驅銀濤萬里風倒翻日月  
無時窮滔滔滄海扶桑東伊昔青蓮太奇蹤錦袍玉  
鞭鯨鱗紅太真犀光徹冥封朱衣絳幘怪影空古人  
既往何所逢高天野鶴鳴喬松我來顧眺心魂雄射  
潮破浪驚蛟龍宇宙茫茫不可從狂醉白雲金碧宮  
一聲鐵篴山靈通騷人羽客誰住青桂之深叢欲逞  
與語樂無終

姑溪泛月

曹履吉

髮稀空鵬冠寒重着羊裘不盡古今意還登太白樓  
長興烟雨  
崔涓

東北重巒接上臺西風驚雨濕雲迴一雙白鳥歸飛  
急兩道青泉拂面來。埜老杖藜春草滑村童吹蘧暮  
烟開須臾霞彩留高嶺萬壑深深點綠苔

白紵山懷古

葛師夔

當年高宴綺羅歡絃管珊珊送夜寒一剪月魂江色  
白滿山春影露光殘曲傳商調哀如玉人憶燈前氣



似蘭今日尚存歌舞地  
遶原荒草恨云漫

謫僊樓

潘 諶

青山有塚名浪傳  
中酒僊鄉正熟眠  
萬古能消幾塲  
醉人生何用獨醒然

謫僊人去雅詩亾  
千載風騷孰擅塲  
我欲騎鯨追逸  
駕江頭雲氣曉蒼茫

雷峰

楊成喬

選勝陟層巔  
高高興灑然  
亂峰橫夕照  
一水帶春田

客有烟霞癖  
人多嵇阮賢  
飛觴徵麗曲  
共醉欲忘還

謝公池

陶 淵

風流誰起謝宣城  
坐對空山想像生  
舊宅已銷千載  
跡新詩猶擅六朝名  
池邊鳥度浮雲影  
谷口鶯啼落日聲  
更上懸崖春色暝  
萬峰蕭索不勝情

蛾眉亭遲任一吾毛繼泉

倪光胤

楚客蕭條悲遠遊  
蛾眉東下亂帆秋  
高江白浪浮孤  
嶼古樹黃花對驛樓  
天闊鳥橫青嶂月  
霜空人散綠

太平三書 卷之十  
三  
蘆洲炎方朔雪還多事人世塵心倍百憂

初秋偕倪蒼舒姑溪夕泛  
端汝洛

野性從來偏狎野與君終日坐孤航人疑縱酒同嵇  
阮誰識玄言似惠莊水落濤侵茶椀白晚來風透葛  
衫涼迴橈爲問蓬蒿宅徒倚柴門戀夕陽

再遊馬山菴  
倪一鳳

水色通幽徑香光接絳臺海樓今日度僊客幾時來  
松子月中落芝房雲外開會心兼送目一望一徘徊

識舟亭看山間紅樹  
張大有

何處西風不蕭瑟長林一抹綴紅霞幾番啼月未成  
血纔自經霜便作花碎剪瓊箋題御苑忙傳鴈字徧  
天涯夕陽樹抄憐秋老故襯殷鮮闔晚華

登赭山遇雨  
前人

醉自扶筇吹欲醒蒼茫彌望雨溟溟描摸黛色看宜  
濕江上迤邐到處青

登白紵山同潘景升分韻  
祝可仕

春風三度過吾廬得伴躋扳破涕初洞口蚪枝雷雨  
化坡前香韻雪霜餘四山圖畫供新譜數艇烟波狎  
老漁快有安仁歌白紵冷然雙翼欲凌虛

無相寺

前人

載酒招提共問禪春風二月百花妍光澄一水涵天  
影秀發千山散曉烟鳳輦不來芳草合龍章猶在翠  
雲連只今蓮社容元亮頌聖誰將白雪傳

秋日過馬山庵

王綮

亦是舊遊地重遊山更奇樹圍高閣窈巖礙夕陽遲  
桂粟香生砌桐陰碧覆池小窓餘短夢猿鶴若爲期

秋日錢明初邀飲雷巖

前人

落落長松蠹古臺登臨今笑少人來雲衣半染山偏  
媚霜葉初酣菊漸開江郭帆檣晴自遠水鄉塲圃晚  
相催扁舟向夕蒹葭亂何處寒流可遡洄

春日登黃峰

張一躍

凌敲遺跡野苔封紺宇斜連第幾重一派春流環古

九平三書 卷之十一  
岼半山殘照下青松幽人石借參差榻大地烟迷遠  
近峰最是花韉人去早獨憐清興寄疎鍾

初夏飲無相寺分得微字 前人

寂歷空門晝掩扉一尊同解薜蘿衣苔垣草徑無人  
到淺浪垂楊有鳥飛天外晴嵐時出沒湖邊雲樹白  
熹微醉來堤上斜陽滿正是山僧乞食歸

辭建百歲坊 李一策

天懷靜以悅豈曰與爲嬰讀史知前哲儲書教後英  
有子食我酒種秫隣其杭有孫意深拓欲養山中生  
陟原緩携杖曝日神不驚採薇與洗耳古人安知榮  
百歲亦易得區區何足名

遊螺磯 李一公

招攜春早大江頭有石如拳水上浮砥柱不隨波作  
錦浪花無似雪成湫凌虛帆艇交光亂隔岸樓臺倒  
影稠得日登臨須拚醉謾題吳漢事生愁

仲夏同鍾象台程星海江軒孺泛舟姑溪宿舟

上卽事

倪芳胤

竭來尋形曠捩舵橫中流遠岫獻晴媚長川涵夕悠  
柳看黃鳥變沙對白鷗浮曖曖雲入樹纖纖月上舟  
閒從漁父問狂逐少年游秀色偏羅綺清歌遲甸洲  
巖城鳴鐸急絳蠟且夷猶鄰舫窺傾竿潛蚪聽落籌  
遙浸敵酒薄遠火覺汀幽借此枕流意一破如山愁  
登雷巖喜世符弟至共飲巖下  
前人  
且艤單舫步林丘屐齒鏗然石磴幽黃葉亂飛清古

木白蕓初放冷滄洲天邊雙岫齊排檻郭外千家曲  
抱流正是茱萸兄弟會插花遲汝共淹留

三山磯

前人

一帶晴沙白千林衰柳黃斷崖開小市孤戍鎖長江  
日落帆檣集天寒鴻雁忙淒清消萬慮抱卷卧蓬牕

荆山寒壁新圖歌

葛綱

却道荆山山峙峭緣江歷歷殊生巧江砂一派水溶  
溶週遭痕落容秋島上有鶴跡印苔明仍有碑字封

烟草衆峰直上日月低絕壁遙窺江練皎斷續過雲  
着色鮮參差垂蔓忘年老細礪流飛響玉寒長松圍  
葉栖猿鳥我曾捨擢一登之桃花迷漫茲山杳雨過  
嵐光凝欲流清鍾隱約翻昏曉別有蘭榭立巖阿而  
我仙郎敦勝好仙郎仙路得易尋仙源水色空人心  
仙郎爲政亦如此於此寒壁無古今水聲戛戛鳴玉  
琴千樹掩映甘棠林

雷岩題石

倪祚胤

籬落尋常水月鄉間君何事戀流光沙邊人影來千  
里天半霜華散小陽假到楚舫初弄楫顧殘吳曲更  
飛觴清溪狎主如今夜殊勝東山且自狂

登金柱山敬和先大父封公

元韻

前人

漫躡飛梯七折輕相輪誰識斷鼇成平沙徑拔金天  
柱去浪聲環水國城添與凌歊雙塔鎮遙將楊子二  
梁橫卽今多少觀風意已占當年創始情

同韓孟郁登凌雲山慨欲家予東畝走筆堅之

前 人

咄咄歸何事好秋去未看忽借新盟人始尋故山歡  
我已似攜謝山如驕識韓故將凌冬枝不令秋容殘  
絳衣穿楓末未知誰作丹白沙消水出行復添幾盤  
渺渺庾關程雙飛無羽翰何來長風吹同飄雲嶺端  
豈不思想者勞而匪合者難此意寒山知冥對應未闌  
君徐起誓我一枝從子安謝客舊棲處荒廬所面巒  
今古均一托數弓寧在寬高天聞此語恐未許君謾

同諸詞人坐尼坡有感

前 人

野人貪愛客家寶出溪山搜此一拳突仰看羣岫環  
漁樵欣讓坐屈宋漫窺班長歎封侯者艱難乞玉關  
期世符菴於尼坡下詩以堅之 前 人

却月存梅種開林向此求好分千佛眼寄上百花頭  
置磴俱因石收峰不必樓袈裟拋便得須笑道旁謀  
舟行望夫磯初見雨後瀑落 首二 前 人

十里磯山古新看過雨泉隨虛紛浣絮就曲各安絃

太平三書 卷之十  
伏處偏施翠飛來若鬪烟平生寫黃鶴對本悵難傳  
自耽雲水癖磯下幾船回如此百泉落何曾一雨來  
卧遊那免悞生面信今開好結漁人伴晴陰飽釣臺

青山道中

前人

野盡忽幽躡翠圍已數重到來知有壑于此耐多松  
落澗沾懸畝歸樵倚半峰家山看絕似恍與故人逢

藏雲山房

前人

有壑能藏寺看峰俱入樓雲邊雙嶼起天際大江流

李太白先生碑記

前人

英雄奇偉之士立於一代流映千古必有不可磨滅  
之隱德令人成思盼想轉味無窮而詩文之高遠灑  
厚時出以動耀人寰亦千古而不墜太白先生古鴻  
絕真品也人主見之神氣高朗軒然霞舉不覺自忘  
萬乘與之如對知交下此無論等夷矣予獨觀其拔  
識郭令公一事夫郭令公在微時素非氣諛特以赴  
都督讌草露布見逮一人至面無慚色詢知令公悼



太平三書 卷之十  
嗟於河西王君龜之故太白點額記之因竭至誠向  
都督祈釋後果爲一代元勳而太白後爲永王事其  
自謂讎責夜郎天與令公碎舌所云能識臣子儀於  
刀斧下而不識永王璘之無成乎皆天特爲太白功  
名別白雖亦可極辨而彰獨唐將推李郭李功固多  
至其與禍逗畱不容追夫終始扶植大義令日光再  
麗非令公而誰乎倘令早殉河西之失欲唐浴虞淵  
而回再造也得乎有令公不可少太白有太白而令

公之事始奇有唐世不可無令公之奇有太白正以  
成令公而千古於昭生氣與陽光靡朽矣世徒服膺  
全集如千里江流吐出神仙腸胃鬱爲小大之宗固  
磨勒不盡要以卓赫天地惟此是其大者墓原在他  
山今續移半嶺之下則唐名賢范公開載極詳吉不  
揣謹書以載尾石

鄭公橋記

前人

去郡下南門可十里許有古蘭若僧舍其傍此路上

接于湖爲七省區要下有灌水橫衝歷邑之四圩與  
姑溪會舊爲橋覆之行者不致病涉斷碑具載尚可  
稽焉浸尋沿今而橋之石梁日廢路僅如線幾爲都  
水宮僧人如方大動于中遂匍匐而告太守鄭公時  
下車甫期月郡所頽壞悉舉獨有介於此橋之未成  
也遂慨然任而趣語吉爲衆姓倡夫禪門廣大其爲  
肇剏寂若烏有卽所稱放光鷲嶽金堞香城不着一  
毫音相高僧興福彙中如法成者長安海池支分安

渠獲佛屋經樓之異又如慧雲見隨河瑞氣瀾漪中  
有天宮影參差樓閣合脊珠璣亦且過而不畱曾是  
一葉功蹟而勃勃于懷邪惟是橋與水爭不濟則水  
馳土漲亡論七省來往無地而此四圩之金錢逋負  
其將魚鱉爲隣乎夫事有經聖賢而不作者蓋以不  
必作故也至於築室爲梁獨推賢於杜預可知古今  
理同一轍太守鄭公不論橋之或大或小津津有富  
平之慶而如僧日披拂于齋居露禱之下有不見而

太平三書 卷之十  
同然恍然體太上以爲心者乎橋凡丈尺若干深濶若干此僧之意更欲稍建於東爲構數楹以便途旅休息姑不盡贅而識其大者以告四衆題曰鄭公橋者宰官志始事當得不朽云爾

濬河記略

前人

姑孰境東南以金陵徽宣諸溪瀦而爲湖曰丹陽已支行遶出白紵凌家山鬟郡治下三江以北曰姑溪河古郡雉雄亘跨溪河上宋初燹於兵徙治縮三之

二始表河而城復外甃太平天井兩壩納河入濠鑿郡東西市渠隙城南北而關引濠注之出達襄城河與外鬟河會維時相繼守土者所爲開濬諸記甚備要其所重濟涉溉田救焚祲疫利士試有司而流汗漚清令風帆雨檣往來兢捷想見宣通精爽與民物受之者前人之亟亟非其得已而喜事也而載準以形家言則兩河適分位巽丁當府脉川字出洪之界交於府右而委洩于乾戌形便之與風氣實互相乘

作者遺意遠矣獨以河避市易壅壅則濬竟則濬不勝壅豈惟終宋世無常畫卽入國朝遞至今日濬以十數工累役而無役市有河而無河者何也公私之議率苦于侵占之難奪與經費之難繼而風水無馮水滂可慮因得以惑之兼主者之真心切意與才辦精敏固未可問此其故又在移徙物力陰陽水稜之外歲昨乙卯直指姚江徐公來按行城堞適訊河身引注與外壩爲通塞爰啓外壩入壕顧奉行於城

隅通濠三關閘遽未深議卽所開阨視諸占隘亦不時清而今直指駱公來當駐劄姑孰初蚤悉郡有河從來濬法未暢密與郡守胡公圖公出則以指趣諸士亟呈勿失乃諸士謁辭未半而直指朗諭已了了先之市河之在城內如人臟腑血脉南北水關則咽喉而尾閘也啓閉時何虞外患今姑息侵沒不大創通身終不利計能崇者獨滂也乎哉有坐令六秀不上堂而破生旺去而民物晏然者乎彼形家言豈真

不值祖龍一燼邪諸亦于僉議誠力若直指與中丞  
臺與道府司屬會無不力金錢視擴該府藏數千金  
若直指能爲發亦無不力毋不給是慮隨飛蓋踏勘  
隨大署呈略云濬濠建閘廣疏鑿嚴侵占惟良有司  
行之有漸持之甚堅乃可底績蓋卽與府公圖而茲  
其斷者也府公成畫已具益虛而集里中諸人條織  
悉上熟酌之入而稟成既定令乃下河面挖展畫若  
千尺深如之役夫以里甲懲匿惰惟勤嚴諭沿河積

占者應治釋不罪第籍其家率五等給資以爲差令  
自礪隄而官礪不與焉水關故不數尺趣毀展濶視  
河第小縮置閘加堅與密設有滂度不能與我爭處  
此更啓外壩加深節節通利于是溪河入而四岸壁  
立二水分流雙槳輕舠欣欣稱便諸窪下地亦不苦  
渰沒正如沉痾人得靈藥頃刻通體腑臟血脉吐納  
頓暢神采欲仙矣乃公私所尤欽者初議時里人曰  
先關而後河公入奉指曰先河而後關蓋以慮始非

常惟移徙難奪于難處做開當不可罷關闌固自審  
得爲耳旣移徙時擾擾見告計所區想心血爲盡使  
易手爲之不知如何氣竭欲停而公果持益堅而竟  
濶深畫一徐乃畢力三關堅而以漸行之果如直指  
片語括盡至其趾錯工徒眼程木石有巧胥黠匠欲  
冒鎚銖而不得者又令易手爲之不知所出何算此  
種真才真意密密與直指印合深摯去處誰得名之  
歲時風氣不必遠俟徵驗惟兩至誠質天地已陰陽

在握矣諸士民快覩不日之成恩直指公不朽而思  
所以勒貞珉祠俎豆者其又何能已夫姑孰緊居孝  
陵上流丹陽湖所瀦諸溪出姑河係龍沙內水宋人  
鑿引入城宋非能用姑孰也真龍沙水穿城入堂實  
通御氣數百年應高皇首渡駐蹕開潛詩曰綿綿瓜  
瓞民之初生向來通塞第占一郡其解細矣直指勁  
節忠讜祖廟牖靈咫尺鼎湖此地此脉穆然胸際而  
以其細者爲里人作解里人直以爲解在是也恩在

是也又何知吉亦聊次其概至纒纒詳之則惟名公  
之如椽在

采石謫僊樓

湯一統

天門雲散兩峰青良夜相逢忍獨醒泛月一樽携采  
石乘風萬里指滄溟光搖河漢槎邊落聲送關山笛  
裏聽共醉蓬窓忘漏永且移蘭漿不須停

秋日偕友人泛舟采石

倪瑞胤

松壑含風勢欲騫携尊跋石夕陽前雙蛾半歛餘寒  
色靜練平舖帶暝煙水落漁舫爭出浦霜稜雁陣遠  
連天錦袍夜泛人千古高韻誰呼月滿船

登橫山題壁

前人

茲山秘靈異怪石排爲戶瑩琮在山泉赴壑蛟龍怒  
孤雲去復來時抹蒼崖樹寒花媚幽姿想是丹餘土  
真白已上僊洞壑誰爲主我輩來躋攀雄辯馳風雨  
天際邈湖山胸中任吞吐

青山

王大壯

為選青山勝綠崖  
叩石扉澗邊藁篠合池上片雲飛  
破蘚香侵屐穿松翠濕衣  
登臨幽興劇矯首意何如

凌敲懷古

前人

浮丘漂渺接孤城  
遠躡凌敲石磴平  
此日河山仍世代  
當年歌舞擅時名  
翠華久矣雲霞護  
玉殿依然草樹橫  
最是夕陽鴉噪處  
令人懷古不勝情

春日遊金峩華蓋洞

魏之屏

雙柑斗酒度金峩  
峴眈鶯聲入艷歌  
萬樹桃花飛絳

雨一谿新水湛清波  
巖懸薜荔三春早  
洞鎖烟霞五色多  
神女已參鸞  
雀去笙簫猶自繞  
青蘿洞相傳為女冠所開

汎舟采石值雨

李冲斗

相見各悄然  
命舟之江滸  
冥濛未即收  
淒風冒寒雨  
潮平積霧深  
山缺層雲補  
一巵一凝思  
觴政殊無苦  
暑月此留連  
傷懷迹易古  
夜榻一燈微  
刺刺西湖譜  
待向春明期  
游屐知焉取

謫仙樓歌

吳士琇



仙籍兩禡饑不死明月千載沈江水江頭鬱鬱十二  
樓蒼梧不見烟波愁樓前李花靜無語春風吹落歸  
何渚沈香亭折喚不醒江樓夜午窺得停鯨呼巨浪  
舞磯下鵬捎長雲連四野紫綺夜濕露無聲醉挈芙  
蓉朝玉京空樓歲暮簾不捲江潮如鼓風如剪樓前  
江水駭殺人時時刻刻怪變新我嗟世事不如水歲  
歲年年貼樓趾堤印孤鴻跡已消檻拂雙蛾黛不描  
樓頭酒盡江頭酤洗耳夢聽誦三賦君不見前身伯

陽老宮戟伐毛洗髓遭訶謫深山高蘆金馬門秦房  
漢殿同榛蘩

過采石

前人

尋山穿石罅放艇亂江流匹練磯前織修蛾天際浮  
帆輕三峽水楓落九疑秋直北平蕪望風烟起夕愁

牛渚

前人

秋高萬里迥江空磯下寒潮磯上楓千古流雲吹月  
夜惟憐估客咏孤蓬

雷峰閒眺

端汝洋

孤巒天半立，日夜會龍吟。  
吳楚江聲合，林巖雨氣深。  
狂呼千里月，痛飲一囊琴。  
搔首石亭畔，悠悠思古今。

謝公池

前人

百折扳崖險，藍輿小徑偏。  
鶯花籠曉霧，絲柳織寒烟。  
疊石崑爲屋，畊雲嶺作田。  
何須歷五嶽，此地足逃禪。

早春游雷巖

倪漢儒

臘盡江城春又逢，探春結伴到高峰。  
閒身幸謝風塵

擾野興偏於丘壑，濃寒勒岸容欺弱。  
柳晴驕山色媚，孤松重來桃李芳。  
菲日踏遍蘼蕪荷鍾從。

梁山晚眺

楊芝瑞

怪石巉巖矗雨峰，青天削出玉芙蓉。  
登臨一嘯浮雲淨，竹杖凌風欲化龍。

同沈崑銅朱西雛家尺木月盤山得雷峰二字

正韻

蕭雲倩

出郭穿雲入翠微，雄才健氣總難追。  
繁霜猶啓巖松

秀澹日能留野鞠暉石逼中峰連象斗秋歸萬壑隱  
龍雷登臨共涕河山邈相醉花前未忍回  
一杖憑空逐怨鴻幾年踪跡任飄蓬千林落葉成金  
谷十月高寒竝玉峰客屐早迷山下霧仙幢夕捲洞  
中風殘陽古廟荒涼處猶覺深潭起臥龍

蛾眉亭

徐弼臣

江許雙峰峙虛亭對面開蛾眉如顧盼蟻酒勸徘徊  
紀勝遺碑繞同人特地來采磯疑洛浦神女出江隈

謫仙樓

端揆

添花煩惱惹花羞一曲清平宮怨收惟是夜郎漂泊  
後蛾眉雙鎖爲君愁

雨霽登橫山

集古

鍾嘉生

蕭條微雨絕

賈島

林曉日初懸

宋之問

石壁橫翠色

李白

雲門吼瀑泉

杜甫

曦庭交雜樹

陳子昂

神府枕通川

駱賓王

王夙有求問志

鄭巢

人來意豁然

羅隱

九日從家都諫招同孫我弘張貞菴楊仲房林

楚良方姬靜憐泛舟眺龍山 前人

九日龍山飲 李白 千峯劃彼蒼 孟浩然 開襟坐霄漢 宋

問 延首詠霓裳 王績 酒影搖新月 岑參 河流帶夕陽

喻島 今朝落帽客 錢起 懷古醉餘觴 李青蓮

太平風雅 閨秀

釣魚臺 凌雲山下 濮士壘

巖石大于臺臨流補洪缺一水自潑迴萬山中斷絕

臺上草如絲臺下鷗如雪月下是何人垂竿釣未歇

舟泊姑溪 端淑卿

舟泊姑溪上殘霞晚不收潮喧半江月水映一天秋

荆益英雄盡秦淮今古流却怜飄泊客恍惚水邊鷗

橫山灰井 前人

春老鶯無語風生樹有聲登山疑是夢採藥不知名  
玩水鷗吟細臨松鶴唳清煉丹求術法灰井覓雙成

暮泊丹湖

前人

扁舟薄暮繫江千日落鴉啼萬木殘一片漁燈明遠  
水數聲仙犬吠層巒芙蓉月冷花枝瘦蘆荻風高雁  
影寒自愧驚濤雙鬢白定於何日是平安

蛾眉亭

前人

東南山秀麗王孫樂此遊絕壁懸京口奔流下石頭  
漁樵雙岸火鴻雁一聲秋捉月人何在依依月滿樓

秋夕泊丹湖

前人

秋水茫茫帶白蘋魚舟蟹網集湖濱長空入暮烟雲  
起只聽歌聲不見人

太平三書卷之十一

濟南張萬選舉之甫編輯

風雅二集

牛渚

張時瑒

哭兀磯頭春浪生  
天門霽色擁江城  
六朝已逐浮雲去  
二水從含片月明  
點點征帆風外渺  
寥寥烟樹望中平  
王孫斗酒還堪共  
何事靈犀徹底清

黃山

前人

林臯雪色入春饒徐步招提過野橋倚馬客來山寺  
寂牧鷄人去碧天寥澄江一碧連三楚行殿千櫺感  
六朝徙倚浮圖重眺望五雲深處正嵒峩

訪吳波亭遺址

羅萬爵

江亭地第吳波冷何處闌干艷春影蜀客當年不再  
遊常留赴海岷江永岷江東過中江路岸接黃鬚擲  
鞭戍抵枕人驚赤玉盤霓旌導出扶桑樹亭題拾字  
湖陰曲曲愛春波凝曼睞赤日妖星異死生虺隤

驥騰龍足重徠天馬珊瑚鞭迴數齊州九點烟共道  
日輪升浴谷莫誇雲旆展連天

舟中望謝公山

陰德顯

望望青山近層嵐映夕暉烟從林杪出身傍水邊飛  
隔岸成魚市中流問釣磯臨風空憶謝月色上秋衣

荆山

湯一湛

孤亭削壁水雲浮一片嶙峋曲磴幽玉瀨飛聲花作  
雪湖天照膽鏡爲秋翻來世事人如夢笑語風高水

自流石篆苔文深日月相看疑是峴山頭

靈墟山訪丁令威仙跡 鍾斗

仙去壇空歲已深祇傳千載說銷沉洞門草色猶風  
雨山頂松聲自古今幽磴畫寒丹火伏間林春暖碧  
雲陰我來欲證長生訣鶴化歸遼何處尋

咏白紵松風 前人

何年古幹尚凌風天矯雙柯欲幻龍鹿尾移根依怪  
石虬枝飄影拂虛空冷冷夜奏幽泉細謾謾陰生

壑通一自清商傳晉曲至今流韻碧烟中

白紵山省墓 徐一范

霜染層林濕紫烟佳城重拜夕陽前只傳當日迎南  
渡又說今時定北燕白紵歌沉山寺外青蓮墓隔帶  
浮前遙遙華表千年立目斷西風鶴影翩

采石道中 張一如

雙筍越文山嚴霜犯客顏程遙幽話縮候變旅情關  
淺水寒魚上頰膾逸鼠間利名消不盡塵路滿人間



泛歐湖

前人

不必從遙望舟中人自仙能離城市日只在水雲天  
海石爭枰道江瑤費箸錢持竿者何意羨爾更適然

再泛歐湖

前人

此水東南去本是荆溪源後來隄防之西流赴江門  
蒼巘烟渚上彷彿意猶存歐陽者誰子扁舟弄朝昏  
標題已異代野老時能言山川與人物空虛來往痕  
逐逐彼羲和鞭扶無停轅吾家本湖畔波浪相吐吞

曉月如出浴晚日如見暎孰過而問者聊以指山樊  
那意趨微名牽人乘高軒數載隔湖聲山蘿不一捫  
同懷感諸彥蕩漾開金樽烟霞若故知相對酬寒暄  
世態良易盡素志宜益敦我思今昔意化機已更番  
他日念此語潮枯刻山根

秋泛歐湖

前人

聊得隔闌闈已是桃花源高懷遵回溪謝客在石門  
巨浸忽向渴賸有微瀾存隨洲生迂折延緣至黃昏

太平三書 卷之十一  
如此樂虛蕩真欲忘名言爲思塵境事俱有晚世痕  
羨彼茅屋叟烟隄鞭犢轅亦羨漁磯客垂綸任魚吞  
胸恒無一物睡覺臍輪瞰名利忽中人入世類遊樊  
樂身以已養寵鶴以乘軒機心酬物處未易良可捫  
所願向江湖種匏爲大尊輒又自珍秘不獻負日暄  
有田當卽歸此盟與君敦蒼山鎮常在巨鰲不交番  
鑿巖維我舟飲淥澆靈根

宿慈湖

前人

閱盡高低路幾盤雙衾一榻寢應甘人更旅店遊將  
老身託與臺事未闌荒埭月依雞夢靜寒槽風動馬  
鈴酸慈磯北去馮舟楫應及清時度急湍

靈澤夫人祠和韻

前人

磯痕亦帶瞿塘波空浸閒雲草共窩石鏡不來泉下  
照玉人猶向月中摩當時家國心俱破此後興亾閱  
又多爲問江南香火地今成北岸樹良禾  
金陵不隔此烟波生死愁城亦樂窩路駕仙車雲一

色宮留故劍日三摩蒼梧帝子悲應似花蓋夫人恨  
已多惟有銷沉憑弔意磯頭風雨隴頭禾

泛姑溪

前人

遙溪相委輸青山龍山間風生牽羅帶草綠搖碧環  
磬壁蝕危岸竿筑咽隱灘常鏡日月孤亦寫雲霞殘  
石髮愛膏沐鼉衣浣組紉鮫人有離宮鮓旋無定潘  
游魚若在虛回鳥爲比翻約結數高士叩此桂檝閒  
未至映華髮且須照蒼顏觥觴交籌祿筆舌傾波瀾

謝李迹已陳桓孟名已闌造物費塵垢爲世鑄賢妍  
共有弔古情千載同永歎不知誰曠懷能付一抹刪  
直推理與往曲任道與還忽忽百年內莫負吾溪山  
元夕自慈磯至太平  
前人

曉載江舟雨河梁泊已燈千簷流濕日一照散春冰  
爆竹時驚檐銀花盡剪繪城闔游屐雜歌管壓金陵  
不盡春途色還看晚市輝火城紅蠟借水國六鰲依  
因憶風流守閒評賞鑿歸蕪湖何必勝此意正深微

采石江上送家大人應詔北上  
倪蕃胤

携手循山際高巖古木蟠秋波迷樹抄斜日澹松巒  
碧落連江盡黃雲直北看天空愁露下應念薊霜寒

游范蘿山

蕭雲從

蘿山頂上望殘春盎盎春氣喧游人春林蔥鬱張高  
陰悲嘯鸚鵡摧春心深青蕪綠豔膏沐江鏡濃舖畫  
一幅濯枝屈佛松千株忽使一山俱有骨虛空不留  
指點痕倚山長嘯楚天驚縱情瀏覽無滯想靜心相

對澗江平憑江望斷天爲低天光水影長參差江爲  
借炤天無秋兩物上下瀾淪之風卷頽雲暮蕭索吹  
逸歸衣越羅薄鴛鏡鷺鼓黃昏齋烟綠叢中吐朱閣  
江潮誼誼細浪花馬頭鐙火鬧浮槎環如鱗瓦排蠶  
衙高低粉堞十萬家夕城擁醉成俄頃碧玉啣光炤  
天影雲插孤青亂遠氛江上嘖嘖數枝筍

登禪嶽寺

端茂杞

幽勝常疑浪得名乘閒登覽慰心旌日移千尺蒼松

影風送雙溪碧澗聲坐石苔衣侵短袂凭欄山氣浣  
虛纓老僧烹茗資枰戰頓令煩襟一日清

泛舟溪上夕登荆山

羅世繡

春山淡如咲餘霞湖上浮載酒碧波起羽蓋遙經丘  
閒情與勝賞討論相紛糾水雲寂還絢道路短亦修  
投鳥翼前驅林壑加深幽平楚不可極長風吹颼颼  
列炬耀泐錫秉燭稱良游高松翳繁星栝鱗動蒼蚪  
健璧傑鬼立羣枝髮紛揉依稀似有語面目誠自羞

維嶽昔降神生申蕃於周千載結一洩磊落今名流  
黃山幻黃海龍髯夙所留騫雲鍾藻思丈人多冥搜  
來過關令尹西去乘青牛培塿聊寓形寧堪答綢繆  
往在泣足人抱壁與世酬連城未卽償路隅誰爲收  
頑石淪他山能無發深憂

蟻磯

前人

望帝春殘帶血啼臨風吊古一含凄埋幽暗鎖吳宮  
恨飛夢空勞蜀道迷松栢成陰如擁翠魚龍負石爲

磨笄水心自有澄清處莫向粧樓覓舊題

姑溪

端茂杰

小閣欹危岼悠悠思不羣鸞聲三里店人卧一溪雲  
看劍星芒濕停杯月色分輞川圖畫絕此地共清芬

翫鞭亭懷古

沈士柱

亭影荒涼落照中古隄衰柳動悲風江城烽火連雲  
黑野店珊瑚拂酒紅當日反轅同鐵馬後人停轡笑  
沙蟲豺聲未震烟塵靖深媿君家老阿童

湖居

徐鼐臣

數卷茅茨傍野汙環溪窈窕隔塵紛孤欹半壁驚風  
雨小闢明窓納水雲詩弔青蓮移短棹歌裁白苧醉  
殘曛莫嫌竟日無人過雪鷺霜鷗自可羣

隱靜寺觀李太白先生碑

郝一楷

結伴探奇路不迷千峰翠嶽隱招提建緣杯渡來梁  
季山買深公自晉西野篠拂雲欹古閣寒松積雪鬱  
深谿何年斷碣叢苔蘚翠蝕青蓮彩筆題

寒壁

張其宿

翠峯千尋湖上瀕  
土花石蘚筆難皴  
波凌玉女裳爲  
蔓月照山魁甲似銀  
爲覓舊題苔盡掩  
欲鐫新句石知顰  
捫蘿攀葛巔難陟  
雁影峰頭羽化人

登荆山

葛天驛

嵐光隱隱傍河濱  
石立崖飛香氣紛  
寒鴈幾鳴湖畔  
月疎鐘時送嶺頭  
雲苔封翠壁啼猿  
冷霧積空江宿鳥  
分莫問卞和光十  
乘且從沙碣拂殘  
文

登荆山步葛二霜華韻

韋一鶴

寒崖翠峯砥河濱  
徙倚孤亭落葉紛  
滿岸蘆花搖落日  
數行歸鴈掠荒雲  
湖容一鏡波光遠  
壁立千尋嵐氣分  
何可勝遊無紀事  
酒闌索火誦碑文

土山般若菴

玉之巒

十步轉一徑徑幽  
雲不知到門忽所  
見萬竹沸南颺綠  
光遍山去歲蕤無  
定姿束衣登峭閣  
日定十花池老僧  
爲余說天子曾于  
茲錦褥供跌坐兼  
錫寶王彝

我用裁短偈青鳥亂玄詞杖藜探路極開塞隨轉移  
因憶山無曆春信發梅枝

初夏自郡返邑入猪山鼓下矣從輿中看山猶

可粵

張九如

乘籃破曉晚歸便入谷看山尚宛然幾處疎燈忽明  
城孤城落月自嬋娟塔邊雲起僧寮寂樹外人稀客  
路懸何限野香風欲度重來應為弄新妍

春游青山白雲寺宿山下止

月菴

張宿壁

臨池猶想晉衣冠春冷空山曉氣寒掛影絲蘿牽翠  
帶依堦細草遶青壇閒雲邀我俱為客老樹經風易  
作瀾攬勝莫辭幽徑險輕鞵還拽上層巒

細掬游塵欲滿衣向林寒鳥定還飛穿山破屐愁危  
路回首饑情眷落暉古洞臥雲招鶴寢斷崖啣月照  
人歸草龕一枕霄鐘後孤夢猶將訪翠微

歐湖隄上遙望青山

蕭一芸

最是秋郊曠山容在意中烟深疑路迥雲斷可情通



木末孤巒出湖邊翠影空玄暉如有意幽賞與君同  
紀異

鍾異人名嘉生當塗人易簣之日延高僧讚佛號微  
突而逝面貌如生兩手趺坐若有所結逝前一夕語  
其尊甫都諫公曰兒將去又曰此去白紵違親不遠  
生死去來耿耿不昧殆再來人非偶然也其詳載顧  
宗伯錫疇傳中

濮仲謙名澄當塗人嗜酒能詩尤精于雜技凡竹木  
犀玉之屬經其雕鏤古雅絕倫巧奪化工士大夫珍  
之如得至寶蓋亦游藝之僑盼也

附風雅補遺

天門山

陶安

混沌未鑿天門閉帝遣斲開雙闕麗一抽鍵鑰不復  
 扁彷彿闐闐當雲際岷波如絲來自西狂飈忽駕滔  
 天勢驅馳銀馬就兩崖虎豹遁藏閹者逝向年未曾  
 到此山遙望不知誰抱關但見青山兩黛動顰笑畫  
 出八字宮眉彎春來堤柳青裊娜二梁開顏忽招我  
 一在淮西一江左我詩船船不過仰看天光覺天

陶安

大愛惜玻璃不能唾舉盃帶月嚼冰玉桂香萬斛洗  
空腹夜檄江妃舞長袖爲君翻作天門曲憶昔充貢  
兩赴京九重晨起瞻龍庭懷策空歸名不薦五門簪  
花夢中見

韜玉峰

徐傑

峩峩百丈石夜夜光怪生疑是赤龍起忽有暗雷驚  
飄然落精彩下炤含衛城西域有異僧能辨璞與珎  
揮手向人言此中有良英剖之資世用不見雙南金  
時無向信者翠嶽空埃塵

梁山風

夏祚

曉日度山光不徹陰風吹水玻璃黑驚獅迭馬澡萬  
雷輕帆直界蛟宮雪冰夷倒拔白龍尾白龍翻江江  
立起高者爲山下者谷軒山輕谷舟如擲藥叉窺人  
眈一嚇同舟閉目稽心慙我謝舟人當柰何告余何  
處不風波我亦十載勞勞塵土路崎嶇歷盡驚心數  
須臾風靜烟生一鏡平堪邀一咲凌波去

九平三書卷之三  
青山白雲寺

郭登名

古寺白雲封捫蘿陟幾重碑殘湮頡鳥桂老舞槐龍  
一片天浮翠千行野織茸遠公勤致酒謾謾聽長松  
一勺盈盈注小坳真人養晦舊誅茅五千餘仞岡巒  
迴三十六峰陵谷交石勢立屏常護繞泉聲流韻細  
推敲上方修證超諸品孰是根株孰是梢

蟪磯題孫夫人廟

張宿壁

香氣氤氳透曉牕碧鬟風影尚幢幢楚山楓葉時飄  
瓦蜀地啼鶻不渡江大小阿喬曾有二風塵老婿笑  
無雙彩鸞未返吳波濶沙土寒流迸石瀧

杜退思舟開采石山望別

曹履吉

別上燃犀頂看開楊子津沙如盤尼舫石亦語留人  
久立揮襟數笏觀入畫真此情疑小異良約昨重申

秋日登橫山

鍾秀生

爲攬名山勝披襟特地過霜侵楓落錦泉溜石鳴珂

太平三書卷之三  
三  
寺古仙留跡峰高雲掛蘿悠然坐嘯處渾欲爛樵柯

遊青山

周之德

旅宿窮名勝初登信古傳行遵山向背情與石周旋  
納遠月爲覽凭高空可憐謝公遺蹟在同坐到寒泉

禮